

Gnûf materiâl didatic pes scuelis de infanzie dal Friûl



Di çampe:
il president de ARLeF,
Eros Cisilino,
la dirigjente
scolastiche dal Istitût
Comprensif di Puçui,
Elena Venturini e la
referente pe lenghe
furlane dal Istitût,
Annalisa Galati.

In distribuzion a passe 600 classis, par sostignî lis ativitâts di insegnament de lenghe furlane tal prossim an scolastic

In chestis setemanis e je tacade la consegne, a passe 600 classis de scuele de infanzie, di materiâl didatic e informatif de bande de ARLeF – Agenzie regionâl pe lenghe furlane. E je une operazion che e ven daûr di chê fate l'an passât, cuant che a son stâts dâts fûr i posters educatîfs di Anin e che si zonte aes ativitâts che la Agenzie e promôf intal setôr scolastic. In chest câs specific, la distribuzion, sore nuie, e à cjapât dentri 233 scuelis de infanzie dal teritori di lenghe furlane, ven a stâi 174 istitûts comprensifs e 59 scuelis paritariis.

Sedi ai piçui arlêfs che ai insegnants a son stâts furnits materiâl che a podaran

supuartâ la ativitât di insegnament dal furlan. Dai albums par colorâ ai audiolibris cun filastrocjis par furlan, dai dvd ai posters; cun di plui anje tantis schedis didatichis coloradis pensadis propit pai plui piçui, che a judaran i insegnants tal stimolâ frutis e fruts in maniere dinamiche e divertente. La distribuzion si è sielt di fâle ae fin dal cicli scolastic par permeti di tornâ a tacâ tal mès di Setembar cuntune grande selezion di materiâl za a disposizion dai docents.

Il president de ARLeF, Eros Cisilino, al à consegnât i materiâl di persone e in maniere simboliche al ples de scuele de infanzie di Terençan, par marcâ la firme dal protocol di intese pe tutele e pe promozion de lenghe furlane, fat che al è pôc cul Comun di Puçui. A àn partecipât al incuintri la dirigjente scolastiche dal Istitût Comprensif di Puçui, Elena Venturini e la docente referente pe lenghe furlane dal Istitût, Annalisa Galati.

Chestes gnove distribuzion e rapresente la implementazion naturâl di un progjet plui grant che, de fin dal 2022 incà, al à impegnât la ARLeF te distribuzion sore nuie, in ocasion di ogni an scolastic, dal Manuâl pal insegnament de lenghe furlane "Anin!" intes scuelis primariis. Chest, di fat, al è il prin manuâl pensât par compagnâ i arlêfs a scuvierzi il furlan, lis particolaritâts dal teritori dal Friûl, la sô storie e la sô culture. Il progjet al è promovût de ARLeF par meti in vore il Plan gjenerâl di politiche linguistiche pe lenghe furlane 2021-2025 de Regjon Autonome Friûl-Vignesie Julie. Il volum al è dât fûr a gratis a ducj i arlêfs de scuele primarie che i lôr gjenitôrs a àn aderît al insegnament de lenghe furlane tant che previodût de leç 482/99 e de leç regionâl 29/2007.

Par ogni informazion, i docents a puedin contactâ il Sportel Regionâl pe Lenghe Furlane clamant il 0432.1743400, o scrivint ae direzion email scuele@sportelfurlan.eu.